

---

## K J A R A S A M N I N G U R

milli  
Félags íslenskra náttúrufræðinga (FÍN) annars vegar  
og  
Náttúrustofu Norðaustulands (NNA), hins vegar  
um kjara- og réttarstöðu félagsmanna FÍN .

### 1. gr.

*Gildissvið og ófrávíkjanleiki*

Kjarasamningur þessi tekur til þeirra starfsmanna NNA, sem eru félagar í FÍN og eru þeir nefndir félagsmenn í samningi þessum.

Breytingar í ráðningarsamningi félagsmanni í óhag – í heild eða að hluta – eru ógildar, sbr. 24. gr. laga nr. 94/1986 um kjarasamninga opinberra starfsmanna.

### 2. gr.

*Meginefni*

Um kjör félagsmanna sem samningur þessi tekur til, og samskipti aðila samnings þessa skal fara eftir öllum form- og efnisákvæðum kjarasamnings FÍN við fjármálaráðherra f.h. ríkissjóðs á hverjum tíma – svo og fylgiskjölum og öllum bókunum eftir því sem við á – nema öðruvísi sé sérstaklega um samið í kjarasamningi þessum við NNA. Kjarasamningur FÍN við fjármálaráðherra var síðast endurnýjaður 28. febrúar 2005 ásamt 2 fylgiskjölum og 6 bókunum, samþykktur af 23 af 24 aðildarfélögum BHM sem aðild áttu að honum í mars og apríl 2005 og af fjármálaráðherra 26. apríl 2005. Kjarasamningurinn liggur fyrir við samningsgerð þessa ásamt fylgiskjölum og bókunum og hafa báðir aðilar kynnt sér þessi gögn.

### 3. gr.

*Önnur réttindi*

Um kjör félagsmanna og réttindi – svo og aðrar skuldbindingar samningsaðila – fer einnig að breyttu breytanda eftir eftirfarandi samningum og viljayfirlýsingum ríkisins við BHM f.h. aðildarfélaga þess:

- a) Samkomulag um trúnaðarmenn, dags. 9. janúar 1989, milli fjármálaráðherra f.h. ríkissjóðs og BHMR f.h. aðildarfélaga.
- b) Samkomulagi um starfshætti samstarfsnefnda, dags. 9. janúar 1989, milli fjármálaráðherra f.h. ríkissjóðs og BHMR f.h. aðildarfélaga.
- c) Samkomulagi um form ráðningarsamninga og skyldu til að upplýsa starfsmenn um ráðningarkjör milli fjármálaráðherra annars vegar og ASÍ, BHM og BSRB hins vegar, dags. 25. júní 1996 (sbr. reglur nr. 351/1996).
- d) Samkomulagi um lágmarksreglur um auglýsingar á lausum störfum samkvæmt 7. gr. laga nr. 70/1996 um réttindi og skyldur starfsmanna ríkisins milli fjármálaráðherra annars vegar og ASÍ, BHM og BSRB hins vegar, dags. 12. ágúst 1996 (sbr. reglur nr. 464/1996).

- e) Samningi um ákveðna þætti er varða skipulag vinnutíma, dags. 23. janúar 1997, milli fjármálaráðherra f.h. ríkisins, Reykjavíkurborgar og Launaneftndar sveitarfélaga annars vegar og ASÍ, BHM, BSRB og KÍ hins vegar.
- f) Samningi um rétt þungaðra kvenna til mæðraskoðunar, dags. 13. ágúst 1999, milli fjármálaráðherra og BHM.
- g) Samkomulag Bandalags háskólamanna, BSRB og Kennarasambands Íslands og fjármálaráðherra f.h. ríkissjóðs um viðbótarframlög til lífeyrissparnaðar, dags. 20. desember 2000.
- h) Samningur um vörlu og ávöxtun orlofsfjár, dags. 25. maí 2001, milli aðildarfélaga BHM, SPRON og fjármálaráðuneytis f.h. ríkissjóðs, óski starfsmaður þess.
- i) Samkomulag frá 22. desember 2004 milli fjármálaráðherra f.h. ríkissjóðs, Reykjavíkurborgar og Launaneftndar sveitarfélaga annars vegar og Bandalags háskólamanna, Bandalags starfsmanna ríkis og bæja og Kennarasambands Íslands f.h. aðildarfélaga sinna hins vegar um tiltekin atriði er varða réttindi starfsmanna sem eru félagsmenn aðildarfélaga framangreindra samtaka.
- j) Yfirlýsing í tengslum við endurnýjun kjarasamninga veturninn 2004-2005, dags. 16. febrúar 2005.

#### **4. gr.**

##### *Réttarstaða*

Réttindi og skyldur félagsmanna í starfi hjá NNA skulu að öllu leyti vera hliðstæð réttindum og skyldum ríkisstarfsmanna samkvæmt ákvæðum laga nr. 70/1996 um réttindi og skyldur starfsmanna ríkisins (starfsmannalaga), svo og stjórnsýslulögum nr. 37/1993, þ.m.t. um form- og efnisreglur sem stofnun ber að virða áður en gripið er til uppsagnar, að undangenginni áminningu þegar við á, sbr. 21. og 44. gr. starfsmannalaga, svo og skyldu stofnunar til að rökstyðja uppsögn og áminningu. Kærustig samkvæmt 2. mgr. 13. gr., 1. mgr. 20. gr., 5. mgr. 26. gr., 2. mgr. 30. gr. og 2. mgr. 44. gr. er stjórn NNAAar.

#### **5. gr.**

##### *Efni ráðningarsamnings*

Við ráðningu félagsmanna er skylt að nota til þess gerðan ráðningarsamning, sem báðir aðilar viðurkenna. Í ráðningarsamningi skal auk tilvísunar í starfslýsingu tilgreina starfsheiti, laun, greiðslutímabil launa, vinnutímafyrirkomulag, vinnutíma, vinnustað, upphafstíma ráðningar – svo og lokadag sé ráðning tímabundin, starfsaldur og önnur starfskjör, svo og stéttarfélag, sem starfsmaður velur. Að öðru leyti vísast í samkomulag um form ráðningarsamninga og skyldu til að upplýsa starfsmenn um ráðningarkjör milli fjármálaráðherra annars vegar og ASÍ, BHM og BSRB hins vegar, dags. 25. júní 1996 (sbr. reglur nr. 351/1996).

**6. gr.**

*Lífeyrissjóðsaðild*

Félagsmenn eiga rétt á að vera í A-deild Lífeyrissjóðs starfsmanna ríkisins (LSR) og greiða 4% iðgjald til LSR. NNA greiðir mótfraum til LSR samkvæmt reglum LSR á hverjum tíma, nú 11,5%, sbr. lög nr. 1/1997 um LSR og samþykktir sjóðsins á hverjum tíma. Félagsmenn sem nú eru í B-deild LSR halda þeim rétti áfram, sbr. lög nr. 1/1997 um LSR / 2/1997. NNA greiðir mótfraum til B-deilda samkvæmt reglum sjóðsins á hverjum tíma, nú 6%, enda hafi NNA tryggt sér heimild til þess.

**7. gr.**

*Sjóðsaðild*

Aðild félagsmanna að sjóðum á vegum BHM, Orlofssjóði BHM, Starfsmenntunarsjóði BHM og Styrktarsjóði BHM, svo og Fjölskyldu- og styrktarsjóði opinberra starfsmanna er sem endranær háð greiðslu sjóðsframlags samkvæmt gildandi kjarasamningi sem vísað er til í samningi þessum. Sama gildir um aðild félagsmanna að Vísindasjóði FÍN.

**8. gr.**

*Gildistími*

Gildistími kjarasamnings þessa er sá sami og gildistími kjarasamnings FÍN við fjármálaráðherra, eins og hann er á hverjum tíma, sbr. grein 2.

**9. gr.**

*Lagarammi*

Um samskipti aðila kjarasamnings þessa – þ.m.t. réttarstöðu trúnaðarmanna, samstarfsnefndir, gerð kjarasamninga og vinnudeilur – gilda tilvitnaðir samningar og lög um kjarasamninga opinberra starfsmanna, sbr. 2. gr. laganna.

**10. gr.**

*Betri réttur*

Félagsmenn, sem notið hafa betri réttinda en samningur þessi gerir ráð fyrir, skulu halda þeim óskertum.

Reykjavík, hinn 21.09. 2006,

Samþykkt f.h. Félags íslenskra náttúrufræðinga,  
með fyrirvara um samþykki félagsmanna,

Samþykkt f.h. NNA,